

Penganggur mengaku miliki dadah didenda RM2,500

KUCHING: Padah memiliki 0.003 gram Methamphetamine, seorang penganggur lelaki didenda RM2,500 atau lima bulan penjara di Mahkamah Majistret semalam.

Hukuman itu dijatuhkan oleh Majistret Mason Jaro Lenya Baraya sebaik Mohammad Nizam Kasawani, 39, mengaku bersalah apabila didakwa mengikut Seksyen 12(2) Akta Dadah Berbahaya (ADB) 1952.

Kesalahan yang dihukum di bawah Seksyen 12(3) Akta yang sama itu memperuntukkan hukuman denda tidak melebihi RM100,000 atau penjara

tidak melebihi lima tahun atau kedua-duanya sekali jika sabit kesalahan.

Berdasarkan pertuduhan, dia didakwa melakukan kesalahan itu sekitar jam 1.15 petang di tepi jalan Lorong Cahaya Damai 9 Bandar Baru Samarang, di sini.

Mengikut fakta kes, sepasukan polis menahan tertuduh di tepi jalan berkenaan kerana disyaki terlibat dalam penyalahgunaan dadah.

Polis melakukan pemeriksaan fizikal terhadap tertuduh dan menjumpai sepeket plastik lutsinar di dalam beg

yang disilang di badan tertuduh.

Hasil pemeriksaan lanjut mendapati terdapat ketulan-ketulan kristal disyaki dadah jenis syabu di dalam plastik lutsinar terbabit dengan berat kasar 0.16 gram.

Tertuduh kemudian dibawa ke pejabat Bahagian Siasatan Jenayah Narkotik IPD Kuching untuk tindakan selanjutnya.⁶

Pendakwaan dilakukan oleh Pegawai Pendakwa Inspektor Merylene Lindan Andrew Mang. Tertuduh tidak diwakili peguam.